

## EN PAULUJ A KIJIN LIKAU KAIEU ON MEN KORINT

<sup>1</sup> PAULUJ me paeker, en wiala wanporon en Iejuj Krijtuj amen pan kupur en Kot o ri atail Jojtenej, <sup>2</sup> *On* momodijou en Kot me mi Korint, me jaraui kila Krijtuj Iejuj, me paeker en jaraui o karoj me kin likwir *on* mar en atail Kaun Iejuj Krijtuj ni deu arail o deu at. <sup>3</sup> Mak o popol *jan* ren Kot Jam atail o atail Kaun Iejuj Krijtuj en mi re omail! <sup>4</sup> I kin danke ai Kot kaukaule pweki mak en Kot *on* komail, me papana *don* komail *jan* ren Krijtuj Iejuj, <sup>5</sup> Pwe komail me pai kidar i ni meakaroj, ni majan karoj o lolekon karoj; <sup>6</sup> Duen kadede iran Krijtuj a *teniten* re omail; <sup>7</sup> Pwe jota pai en mak eu, me komail jaik pai kidar; ni omail auiaui kajanjal en atail Kaun Iejuj Krijtuj. <sup>8</sup> Me pil pan kotin kajone komail di lao lel imwi, pwe en jolar dip omail lao lel ni ran en atail Kaun Iejuj Krijtuj. <sup>9</sup> Kot me meler, me komail paekerdo, pwen jau pena ren japwilim a Ol Iejuj Krijtuj atail Kaun. <sup>10</sup> Ri ai kan, i panau komail ni mar en atail Kaun Iejuj Krijtuj, komail en wiaki eu ni omail kajoi kan, pwe komail de wuki pajan nan pun omail, a komail en mi ni lamalam ta pot o kapun ta ieu. <sup>11</sup> Ri ai kan a kalok *don* ia *jan* toun im en Kloe, me dene komail kin akamai pena nan pun omail. <sup>12</sup> A iet me i men inda, amen komail kin inda: *Nai* nain Pauluj amen; a *nai* nain Apoloj amen; a *nai* nain Kepaj amen; a *nai* nain Krijtuj amen. <sup>13</sup> Iaduen,

Krijtuj me lop pajan? Iaduen, Pauluj me lopu kin komail er? De komail paptaijekier ni mar en Pauluj? <sup>14</sup> Nai me danke Kot, me jota meamen re omail, me i paptaijela, Krijpuj eta o Kaiuj; <sup>15</sup> Pwe amen de inda, me nai wia paptaije *on* ni pein ad ai. <sup>16</sup> A toun im en Jtepanaj i pil paptaijela; a jolar me i aja, me i paptaijela. <sup>17</sup> Pwe kaidin en wia paptaij, me Krijtuj poron kin ia la, a pwen padaki ronamau, kaidin ni tiak kadek lokaia, pwe lopun Krijtuj de mal la. <sup>18</sup> Pwe majan duen lopu me mal kot ren me lokidokilar akan, a manaman en Kot *on* ir, me pan dorela. <sup>19</sup> Pwe a intinidier: I pan tiakedi lolekon en me lolekon kan, o karotonala marain en me marain akan. <sup>20</sup> Ia me lolekon o? O ia jaunkawewe o? Ia me lolekon o en pali pa? Dadue, Kot jota wia lamponki me erpit en pali pa? <sup>21</sup> Aramaj akan jota aja Kot pweki udan ar lolekon. Kot ap kupureda, en kamaur kida, me pojon akan padak monai. <sup>22</sup> Pwe Juj akan kin poeki kilel akan, a men Krik kin roporop lolekon. <sup>23</sup> A kit kin padaki Krijtuj me lopuedar, men kamakar *on* Juj akan o *on* men liki kan kajoi mal. <sup>24</sup> A *on* me paeker akan, men Juj o pil men Krik, je kaweweda Krijtuj manaman en Kot o erpit en Kot. <sup>25</sup> Pwe joerpit en Kot me jikida *jan* en aramaj akan ar lolekon, o luet en Kot me kelail *jan* en aramaj akan ar kelail. <sup>26</sup> Ri ai kan, komail kilan duen omail paeker. Pwe kaidin me toto ren me lolekon en pali uduk kan. Pil kaidin me toto ren me poe kan, pil kaidin toto ren me majamaj akan, me pilipildar. <sup>27</sup> A Kot kotin piladar me jo lolekon nin jappa, pwen kapouiala me lolekon kan; o Kot me kotin piladar me luet nin jappa kan, pwen kapouiala me kelail akan.

28 O me mal nin jappa, o me jo konekon, i me Kot kotin piladar, o me jota meakot, pwen kawela me lapalap. 29 Pwe uduk der akjuaiki mon Kot. 30 A komail tapi jan i ren Krijtuj Iejuj, me wialar atail erpit jan ren Kot, o pun, o jarau, o maur patail. 31 Pwe duen a intinidier: Me men juaiki, i en juaiki Kaun o.

## 2

1 RI ai kan, ni ai pwara won komail er, kaidin ni kadek lokaia de lolekon en aramaj, me i padaki on komail er kadede en Kot. 2 Pwe i jota wia kin ia, en aja meakot nan pun omail, Iejuj Krijtuj eta o a kalopuela. 3 O nai mimi re omail ni ai luet, o majak, o rerer toto. 4 O ai kajoi o ai padak kaidin ni kadek lokaia en lolekon, a ni kadede en Nen o manaman. 5 Pwe omail pojón de pajoneki lolekon en aramaj akan, a manaman en Kot. 6 Ari jo, me kit kin padapadaki me lolekon ren me unjok kan, a kaidin lolekon en jappa et, o pil kaidin en jaupeidi kan en jappa et, me pan jarodi, 7 A kit kin padaki duen erpit en Kot me rir, iei me jo janjal, me Kot kotin kileledier ni en jappa jaik mia, pwen kalinanada kitail, 8 Me jota jaupeidi en jappa men ajadar, pwe ma re ajaer i, re jota pan kalopuela Kaun en linan. 9 A duen a intinidier: Me jota maj eu udialer, o me jota jalon eu ronadar, o me jota ko on nan monion en aramaj amen, iei me Kot kotin kaonop on, me pok on i. 10 A Kot kotin kadiarok on kitail ki Nen e, pwe Nen kin kotin rapaki meakaroj, pil duen kupur en Kot. 11 Pwe ij aramaj, me kin aja duen lol en aramaj akan, pwe nen en aramaj eta me mi re a? Iduen Kot, jota me

aja meakan me udan Kot, pwe Nen en Kot eta. <sup>12</sup> A kaidin nen en jappa, me kit aleer, a Nen en Kot, pwe kit en ajada meakan, me Kot kotiki *on* kitail er. <sup>13</sup> I me kit pil kin padaki wei, kaidin ni lokaia o manin pan lolekon en aramaj, a ni majan akan, me Nen kotin kaweweda, kareda dipijou *nenin* akan. <sup>14</sup> A aramaj ip pwel jota kin ale meakot ren Nen en Kot, pwe me mal kot *on* i, pwe a jota kak *on*, pwe mepukat kin kajaiada ren Nen. <sup>15</sup> A me *nenin* kin kajaiada meakaroj, ap jota amen me pan kak kajaiada i. <sup>16</sup> Pwe ij me aja duen kupur en Kaun o, de ij me pan kak padaki *on* i meakot? A Nen en Krijtuj kotikot lol atail.

### 3

<sup>1</sup> ARI ri ai kan i jota kak padaki *on* komail dueta *on* aramaj *nenin*, a *on* me uduken o kijin jeri en Krijtuj akan. <sup>2</sup> I kamana kin komail pil en didi, a kaidin kijin mana, pwe komail jaikenta kak *on*, o komail pil jota kak *on* anjau wet. <sup>3</sup> Pwe komail non uduken pwe iaduen, ma peirin o akamai, mi re omail, komail jo uduken o weweid ni tiak en aramaj akan? <sup>4</sup> Pwe amen kin inda: Nai nain Pauluj amen, a amen: Nai nain Apoloj amen. Komail jo kin mi nin tiak en aramaj? <sup>5</sup> Pwe ij Apoloj? O ij Pauluj, kaidin papa kai, me komail aja janer lamalam duen Kaun o kotin pan *on* amen amen? <sup>6</sup> Nai me padukedier, a Apoloj me kalamu ir adar, a Kot me kotin kaparadar. <sup>7</sup> Ari kaidin i meakot, me padukedi, pil kaidin i, me kalamu ir adar, a Kot eta, me kotikidar wa kan. <sup>8</sup> Ari, me kin padukedi o me kin kalamu ir adar, ira dupeneta, o amen pan katin ki iran ara dodok. <sup>9</sup> Pwe kit me jauaj pan

dodok en Kot, a komail japajap en Kot, o japwilim en Kot a kakau im. <sup>10</sup> Nai me wiadar pajon ki mak en Kot me i aleer duen jauje lolekon amen, a amen ujewei kakau poa, a amen amen en kalaka duen a kakau pon pajon wet! <sup>11</sup> Pwe jota me pan kak wia eu pajon, me pan toror jan me wiauiet, i eta: Iejuj Krijtuj. <sup>12</sup> Ari, ma amen pan kauada pon pajon wet kold, jilper, takai, kajampwal, tuka, rä, pain kit akan, <sup>13</sup> Nan wiawia en amen amen pan janjaleda, pwe ran o pan kapareda due, pwe a pan kadiarok kida kijiniai. Pwe kijiniai pan kajaleda wiawia en amen amen. <sup>14</sup> Ma wiawia en amen, me a kauadar poa, pan mimieta, a pan katin. <sup>15</sup> A ma wiawia en amen pan ronala, a jota pan katin. A pein i pan dorela duen amen, me pitila jan nan kijiniai. <sup>16</sup> Komail jota aja, me komail tanpaj en Kot, o Nen en Kot kotikot lol omail? <sup>17</sup> A ma amen kawela tanpaj en Kot, nan Kot pan kawela i, pwe tanpaj en Kot me jarau, ari iei komail. <sup>18</sup> Jota amen en kotaue pein i! Ma amen nan pun omail lamelame anjau wet, me a lolekon, mak eta, en wiala ol pweipwei men, pwen wiala lolekon amen. <sup>19</sup> Pwe lolekon en jappa et me jon en pweipwei ren Kot, pwe a intinidier: A kin kaloe kidi me aklolekon pein ar widiwidin. <sup>20</sup> Pil eu! Kaun o kotin mani, lamalam en me aklolekon kan, me mal. <sup>21</sup> Ari, jota amen en akkeleki aramaj akan, pwe omail meakaroj; <sup>22</sup> Ma Pauluj, de Apoloj, de Kepaj, de jappa, de memaur, de mela, de ma men met, de men mur, pwe karoj me omail. <sup>23</sup> A komail japwilim en Krijtuj, a Krijtuj japwilim en Kot.

## 4

<sup>1</sup> ARAMAJ akan en wia kin kit papa en Krijtuj o jaunkoa pan me rir akan ren Kot. <sup>2</sup> A iaduen jaunkoa kan? Amen amen en lelapok. <sup>3</sup> I jota injenoki, me komail de kapun en aramaj kajau i da. Pein *nai* pil jota kajau i da. <sup>4</sup> Pwe jota me i pein aja, a kaidin met, me i *pun* kila, a Kaun o me kin kajau i da. <sup>5</sup> Ari, komail depa kajau okotme mon a anjau, a lao Kaun o pan kotido, me pan kajanjale *dan* marain okiok en me rotorot akan o kadiarokada lamalam en nan *monioin* akan, amen amen ap pan indandeki ren Kot. <sup>6</sup> Ri ai kan, mepukat i kin inda duen *nai* o Apoloj, pwe komail en ale *jan* kit, pwe amen ender lamelame, me a jiki *jan* me intinidier, pwe komail ender aklapalapaki amen, ap *palian* me teio. <sup>7</sup> Pwe ij me mone kin uk? A jota, me mi re om, me koe jota aleer. A ma koe aleer meakaroj, menda koe kin juaiki, likamata koe jota aleer? <sup>8</sup> Komail medier o kapwapwalar, o komail kin kaunda, ap jota ale *jan* kit. I men, komail en kaunda, pwe kit ap pil pan *ian* komail kaunda. <sup>9</sup> Pwe i lamelame, me Kot kotin wiai *on* kit wanporon akan, en tikitik melel, me mau *on* mela, pwe kit wialar men kapuriamui eu ni jappa mon tounlan o aramaj akan. <sup>10</sup> Kit me *jon* en pweipwei pweki Krijtuj, a komail me lolekonki Krijtuj; kit me luet, a komail me kelail; komail me indand mau, a kit me indand jued. <sup>11</sup> Kokodo lel auer met kit men *manadar*, o pil men nim piladar, o kilijo, o je kin kalokolok, o jota deu at. <sup>12</sup> O dodok ni pein pa at; kit me kalok jued, a je kin kapaiada, kit me kalokolok, a je kin nenenla; Ni at pakaraun mal, kit kin kapakap. <sup>13</sup> Kit wialar tatan kid o

kopataun aramaj karoj. <sup>14</sup> I intiniedier mepukat kaidin pwen kanamenok komail, a pwen panau komail nai jeri kompok kan. <sup>15</sup> Pwe ma omail jaunpadak pan Krijtuj me nen, nan jam omail akan me jota non toto, pwe *nai* me kaipwi komail ren Krijtuj Iejuj ki ronamau. <sup>16</sup> I ari poeki re omail komail en idauen ia do. <sup>17</sup> Pwe i me i kadarki won komail Timoteuj nai jeri kompoke o lelapok pan Kaun o pwen kataman kin komail duen al ai kan pan Krijtuj, duen me i kawewedar ni momodijou karoj. <sup>18</sup> Akai komail me aklapalap likomata i jota pan pwar won komail. <sup>19</sup> A i pan pwar won komail *madan*, ma Kaun o pan kotin kupura. I ap pan kilan kaidin padak en me aklapalap akan, a me manaman. <sup>20</sup> Pwe wein Kot jota mi ni kajoi a ni manaman. <sup>21</sup> Da me komail mauki? I en pwar won komail wa jokon, de limpok o *nen* en opampap?

## 5

<sup>1</sup> I PIL ronadar, me nenek kin wiaui nan pun omail. A eu *jon* en nenek, me jota kin wiaui ren men liki kan; pwe dene amen paudeki en a papa a paud. <sup>2</sup> A komail me aklapalap, ap jota injen juedeki o kajapokela *jan* komail, me wiadar met. <sup>3</sup> A ni ai doo *jan* komail ni pali war, ap koren ion komail ni pali *nen* i iet me i kapunadar, dueta amen, me mi re omail, <sup>4</sup> Ni mar en atail Kaun Iejuj, ni atail pokon pena re omail ni pali *nen* atail, ki manaman en atail Kaun Iejuj. <sup>5</sup> Me wiadar met i *panalan* Jatan, pwen kawela uduk o, pwe *nen* o en kamaurela ni ran en Kaun Iejuj. <sup>6</sup> Kaidin me mau omail juaiki. Komail jota aja, me kalap kij kin kamutala dolepa karoj? <sup>7</sup> Ari, kokowei *jan*

kalap kitai, pwe komail en wiala plaua amaj kap, pwe komail udan plaua amaj kap, pwe atail paja Krijtuj kamatalar. <sup>8</sup> Kitail ari en wiada atail paja, kaidin ni kalap kitai, pil kaidin ni kalap lemai de me jued, a ni plaua amaj kap ni pun o meel. <sup>9</sup> Nai intin won komail er nan kijin likau o, pwe komail ender waroki *on* me nenek kan. <sup>10</sup> Ari mepukat i jota kin inda duen me nenek ren men liki kan, de me norok kapwa, de me lolap akan, de me wun ani, pwe ma idue, komail en katoror wei *jan* jappa. <sup>11</sup> A met i intin won komail er ender waroki *on* amen, me adaneki jaulan, ap nenek, de me norok kapwa, de kati ani mal, de lalaue amen, de kamom joko, de me lolap; komail ender ian i mana. <sup>12</sup> Pwe menda re i men liki? Kaidin ai dodok en kadeik irail ada. Komail jota kin kadeikada nan pun omail? <sup>13</sup> A me mi liki ko, Kot pan kotin kajapoke wei *jan* re omail me jued o!

## 6

<sup>1</sup> A MA amen wia japun *on* amen, menda komail kapun pena mon men liki kan, a jo mon me jarai kan? <sup>2</sup> De komail jota aja, me jarai kan pan kadeikada jappa? A ma jappa pan pakadeikeki komail, iaduen, komail jota itar *on* kadeikada kijin dodok tikitik kan? <sup>3</sup> Komail jota aja, me kitail pan kadeikada tounlan kan? Nan meel kaulap pil kijin tiak tikitik en maur et. <sup>4</sup> A ma komail kin kadeikeki tiak en maur et iaduen, komail kin kapukapun ianaki me jota indant mau ren momodijou? <sup>5</sup> Mepukat i indai *on* komail, pwen kanamenok komail. Pwe jota amen re omail, me lolekon? Jota amen me itar *on* en wiada kapun



nan pun en ri a kan? <sup>6</sup> A amen kin akamai *on* amen ri a mon me jopojon akan. <sup>7</sup> Ari, omail akamai nan pun omail pil udan japun. Menda komail jota muidala meakot? Menda komail jota kin nenenla? <sup>8</sup> A komail kin japun o kotaue *on* ri omail akan. <sup>9</sup> De komail jota aja, me japun kan jota pan jojoki wein Kot? Kalaka pein komail! Pwe me nenek de me kati ani likam akan, de me kamal, de me dir en *inon* jued, de me madon jaut *on* ol oko. <sup>10</sup> De men pirap, de me norok kapwa, de kamom joko, de kinekin mal, de kuli kapwa kan jota pan jojoki wein Kot. <sup>11</sup> Iduen akai komail maj o, a met komail wideudier, o kajarauialar, o pun kilar mar en Kaun Iejuj o Nen en atail Kot. <sup>12</sup> A mui *on* ia meakaroj, a kaidin karoj me kin kamau ia la; a mui *on* ia meakaroj, a jota, me pan poe ia di. <sup>13</sup> Melel, kijin mana me mau *on* kaped o, o nan kapedi wajan kijin mana en ko *on* ia. A Kot pan kotin kawe ira la karoj. A pali war o wiaui *on* Kaun o, a kaidin *on* nenek, a Kaun kotin apapwali pali war o. <sup>14</sup> A Kot me kotin kaiajadar Kaun o, a pil pan kotin kaiaja kida kitail manaman. <sup>15</sup> Komail jota aja, me war omail kokon en Krijtuj? A iaduen, i en ale kokon en Krijtuj, wia kin ir kokon en li nenek amen? O jo! <sup>16</sup> De komail jota aja, meamen me waroki *on* li nenek amen, me ira pan wiala war ta ieu? Pwe a kotin majanier: Ira pan wiala uduk ta ieu. <sup>17</sup> A me waroki *on* Kaun o nan a pan nen ta ieu re a. <sup>18</sup> Komail tane wei jan nenek, pwe dip karoj, me aramaj kin wia, kin wiaui likin war a, a me kin nenek, kin wiada dip *on* pein war a. <sup>19</sup> De komail jo aja, me war omail tanpaj en Nen jarai

me kotikot lol omail, me komail aleer *jan ren* Kot, a kaidin uta 'mail komail. <sup>20</sup> Pwe komail neti kidar pai eu, komail ari kalinanada Kot ki war omail.

## 7

<sup>1</sup> A IET duen me komail intinie *don ia*, a mau *on* aramaj amen, a ender jair li amen. <sup>2</sup> Ari jo, amen amen en ale pein a warok li, o amen amen en ale pein a warok ol, pwen der dender. <sup>3</sup> Ol o en wiai *on* a warok li me inen, a pil dueta li *on* a warok ol. <sup>4</sup> Li o jota kak poedi pein war a, a a warok. Pil dueta ol o jota kak poedi pein war a, a a warok. <sup>5</sup> Der jo oke amen amen, ma jo, pweki inau anjau kij, pwen mot ijejol rer ekij o kapakap, ap pur pena, pwe Jatan de kajonejon komail omail jo oke pena. <sup>6</sup> Mepukat kaidin kujoned eu, pwe pein ai lamelam. <sup>7</sup> A i men aramaj akan karoj en dueta *nai*. A amen amen aleer pein a pai en mak *jan ren* Kot duen amen amen. <sup>8</sup> A *nai* indai *on* me jo papaud o li odi kan, me mau irail en dadaur dueta *nai*. <sup>9</sup> A ma irail jota kak *on*, irail en papaud; me mau papaud *jan* dender. <sup>10</sup> O *on* me papaud akan *nai* me ilaki wei, a kaidin *nai* pwe Kaun o: Li papaud ender kamuei wei *jan* a warok! <sup>11</sup> A ma a muei wei *janer*, i en dadaurata a kirip de kadeke a warok, o ol ender kajela a warok. <sup>12</sup> Kaidin Kaun o, pwe *nai* men indan me tei kan: Ma ri atail ol amen mia, me a paud jopojon amen, ap men mimieta re a, a ender kajela li o. <sup>13</sup> Pil dueta li amen, ma a warok jopojon amen o a men mimieta re a, a ender kajela ol o, <sup>14</sup> Pwe ol jopojon me kajaraui kilar li o, o li jopojon kajaraui kilar ol o, pwe ma a jo due met, noumail jeri kan me

jamin, a met irail me jarau. <sup>15</sup> A ma me jopojon o pan muei wei *jan*, ari i en muei wei *jan*; ri ol de ri li jota kin kaupindi ni mepukat. A Kot me kotin molipe kitail, pwen popol pena. <sup>16</sup> Pwe iaduen, koe li o, koe aja, me koe pan kak kamaurela ol o? De koe ol, koe pan kamaurela li o? <sup>17</sup> A duen Kaun o *pan on* amen amen, duen Kot molipe *on* amen amen, iduen dadaurata; nan iduen *nai ilakilan* momodijou akan karoj. <sup>18</sup> Ma amen me paeker ni jirkomjaij, i en dadaurata a jirkomjaij, a ma amen me paeker ni jojirkomjaij, i ender *ian jirkomjaij*. <sup>19</sup> Pwe kaidin meakot jirkomjaij, o pil kaidin meakot jojirkomjaij, a wiawia kujoned en Kot akan. <sup>20</sup> Amen amen en dadaurata udan a koa ni a paeker. <sup>21</sup> Ma koe paeker ni om ladu, koe der injenjuedeki, a ma koe pan kak maioda *jan*, ari pil me mau. <sup>22</sup> Pwe ladu men, me paeker *on* Kaun o, nan a maio ren Kaun o; o pil dueta me maio men paeker ap pan ladun Krijtuj men. <sup>23</sup> Komail me neti kidar pai eu, der wiala ladun aramaj akan. <sup>24</sup> Ri ai kan, amen amen dadaurata ut arail ren Kot. <sup>25</sup> A duen peinekap akan, jota kujoned eu *jan* ren Kaun o; a pein ai lamelam mia, pwe i aleer mak en Kaun, pwen kak melel. <sup>26</sup> Iet me i lameda, me mau *on* aramaj jota papaud, pwe ni anjau apwal wet. <sup>27</sup> Ma koe kapapaud *on* li amen, ender men muei *jan*, a ma jo om paud mia, ender rapaki li amen. <sup>28</sup> A kaidin dip eu, ma koe pan papaud; o ma jeripein amen pan papaud, kaidin dip. A a pan apwal *on* mepukat ni pali uduk arail. A *nai* jota men, me apwal kot en lel *on* komail. <sup>29</sup> A ri ai kan, mepukat i indada, pweki anjau o me motomot. A pil eu: Me mau *on* me ar warok mier,

en wia dene jota ar warok; <sup>30</sup> O me kin janejan, dene jota janejan; o me kin pereperen, dene jota ar peren; o me kin netinet, dene jota ar kapwa. <sup>31</sup> O me dodokki jappa, ren kalaka, pwe eder wiaki me jued. Pwe mom en jappa et pan rojala. <sup>32</sup> A i men, komail ender lodi *on* me apwal. Me jota papaud, kin apwali me japwilim en Kaun o, duen a pan kaperenda Kaun o. <sup>33</sup> A me papaud, kin lamelame, me kon *on* jappa, duen a pan kaperenda a paud. <sup>34</sup> A nan *pun* en li papaud o peinekap me wuk pajan: Me jota papaud, kin apwali me japwilim en Kaun o, pwen jarau i ni pali war o pil ni pali nen; a me papaud, kin inon ion me kijan jappa, duen a pan kak kaperenda a warok. <sup>35</sup> Mepukat i inda wei, pwen kamaui komail, a kaidin pwen jaliedi komail, a pwen jauaja komail, pwe karoj en inen o *pun* re omail, o pwe komail en papa Kaun o. <sup>36</sup> A ma amen lamelame, me japun, ma a jota pan mueid *on* na jeripein, me mau *on* papaud, en papaud; ari, a pan wia duen me a mauki, pwe kaidin dip, ma a pan mueid *on* i en papaud. <sup>37</sup> A ma amen me kelail ni monion i, pil kelail *on* kaunda, pein injen a, ap inauki *on* nan monion i en kolekol na jeripein, i me mau. <sup>38</sup> Ari, ma amen pan papaud me mau, a ma amen jota pan papaud, me mau jan. <sup>39</sup> Li papaud amen me kaupina kidi *pun* en papaud arain a warok memaur; a ol o lao mela, nan a maio *on* kapapaud, me a mauki, i eta; a en wiaui ren Kaun. <sup>40</sup> Meid pai, ma a pan dadaurata a kirip duen me i lameda, A nai aja, me Nen en Kot pil kotikot re i.

## 8

<sup>1</sup> A kitail ajaer duen mairon *on* ani mal, pwe kitail karoj me lolekon. A lolekon eta kin kaaklapalapiela, a limpok kin kamauiela. <sup>2</sup> A ma amen aklapalapaki a lolekon, nan a jota non dedeki duen me itar *on* en aja. <sup>3</sup> A ma amen pok *on* Kot, nan Kot me mani i. <sup>4</sup> A kitail dedekier duen mana uduk en mairon *on* ani mal akan, pwe ani mal amen jota katepa nin jappa, o jota amen Kot, pwe i me ta men. <sup>5</sup> Pwe ma akai mia, me adaneki kot, me kin mimi nanlan de nin jappa, pwe kot toto o monjap toto mia; <sup>6</sup> A atail Kot me ta men, me Jam, me dipijou karoj tapi jan re a, o me kitail wiaui *on*. O atail Kaun me ta men: Iejuj Krijtuj, me wiadar meakaroj, o me kitail pil wiaui kidar i. <sup>7</sup> A kaidin karoj me aja mepukat, pwe akai mia, me lamelame, me ani mal meakot, ap kankan uduk en mairon *on* ani mal, o iei injen luet arail kin jamin kila. <sup>8</sup> A kijin mana jota kin jauaja kitail ren Kot. Ma kitail jota pan mana, kitail jota pan jued kila, a ma kitail pan mana, kitail jota pan mau kila. <sup>9</sup> A kalaka komail, pwe omail jaladokalar ender kadipikelekel *on* me luet akan! <sup>10</sup> Pwe ma koe, me aja tiak, ap manamana nan im en ani mal o, a me luet amen pan kilan om manamana, ap aima kida nan injen a, ap ian manamana mairon en ani mal akan, <sup>11</sup> Iduen ri atail luet amen, me Krijtuj mata kilar, pan mekila om jaladok. <sup>12</sup> A ma iduen omail dip ion ri atail akan, me kin kawela injen luet arail, nan komail kin wia dip ion Krijtuj. <sup>13</sup> Ari ma kijin mana kamakar ri ai, i jolar pan mana uduk kokolata, pwe i de kamakar ri ai.

## 9

<sup>1</sup> KAIDIN *nai* maiodar? Kaidin wanporon amen *nai*? I jota udialer Iejuj atail Kaun? Kaidin ai wiawia pan Kaun o komail? <sup>2</sup> Ma i jota wanporon amen *on* me tei ko, a *on* komail; pwe komail kajale pan ai koa en wanporon pan Kaun o. <sup>3</sup> Iduen i kin japenki, ma meamen kin kalelapok re i. <sup>4</sup> A jota muei *on* kit er, en mana o nim? <sup>5</sup> A jota muei *on* kit er, en paudeki li amen, me pan *ian* kit jailok jili, duen me wanporon tei kan, o ri en Kaun o, o Kepaj kin wiada? <sup>6</sup> De *nai* o Parnapaj eta me a jota muei *on* liki *jan* dodok en pa at? <sup>7</sup> Ij me kin *ian* mauin ap pwain pein i? Ij me wiada mat en wain eu, me jota kin *kan* kijan wa? Ij me kin kamana pwin man akan me jota kin *kan* pil en didi en man oko? <sup>8</sup> Mepukat i jota kin inda nin tiak en aramaj akan, pwe kaidin kapun o me pil majanier due? <sup>9</sup> Pwe a intinidier nan kapun en Mojej: Koe der pira pena au en kau ol amen, me kin tiaka *pajan* korn. Iaduen, Kot kin apapwali kau ol akan? <sup>10</sup> De kaidin pweki kit, me a kotin majaniekier mepukat? Pwe me kin japajap, en kaporoporeki a dodok; o me kin dolun en kaporoporeki, me a pan *ian* ale kijan wa. <sup>11</sup> Pwe ma kit wiai *on* komail japajap *nenin*, a kaidin me kajampwal kot, me komail pan apwali kit ni pali uduk. <sup>12</sup> A ma a muei *on* me tei kan, ale *jan* omail dipijou kan, nan kit me jo mau *on* *jan* irail? Ari jo, kit jota kol *on* kit tiak wet, a je men mia ni at apwal akan, pwe jen de karompwa ronamau en Krijtuj. <sup>13</sup> Komail jota aja, me irail, me jopijokki jarai, pil manamana *jan* nan im en kaudok, o me

irail, me kin papan pei jarau, pil aleki pwaij ar jan pei jarau? <sup>14</sup> Iduen Kaun o kotin majani, me irail, me padaki ronamau, pil pan manaki ronamau. <sup>15</sup> A nai jota kin kol *on* ia eu ren mepukat, o i jota intin wei mepukat, pwe komail en kapwai *on* ia mepukat, pwe a mau *on* ia en mela, mon amen pan kawela mar ai. <sup>16</sup> Pwe ma i padaki ronamau, jota me i en juaiki, pwe i en udan wiada; pwe jued *on* ia, ma i jota padaki ronamau. <sup>17</sup> Pwe ma i peren kida dodok wet, i pan ale katin, a ma i kan wiada, nan kujoned mia, i en wiada. <sup>18</sup> Ari, ia katin pai ni ai padaki ronamau ap jota pwaipwai, pwe i ender akapwaipwai ki jan ronamau meakot. <sup>19</sup> Pwe nai me udan maiodar jan amen amen, ari jo, i wia kin ia ladun amen amen, pwe i en kamaurela me toto duen i kak *on*. <sup>20</sup> I wia kin ia Juj amen *on* Juj akan, pwen kamaurela Juj akan; o *on* irail, me mi pan kapun, dueta pan kapun amen, pwen kamaur ir ala, me mi pan kapun; ari jo, nai jolar mi pan kapun. <sup>21</sup> *On* irail me jota mi pan kapun, i wia kin ia me jota mi pan kapun amen; ari jo, kaidin nai me likin kapun mon Kot, pwe i kin mi pan kapun en Krijtuj, pwen kamaurela me jota mi pan kapun. <sup>22</sup> *On* me luet akan, i wia kin ia me luet amen, pwen kamaurela me luet akan. Nai wiala jon karoj *on* amen amen, pwen kamaurela akai waja karoj. <sup>23</sup> I me i kin wiawia pweki ronamau, pwe i en ian i pwaijaijki. <sup>24</sup> Komail jota aja, duen men weir en *tan*, irail karoj kin *tan*, a amen ta, me pan ale pai? Komail ari en *tan* idipok, pwe komail en ale. <sup>25</sup> A amen amen me aktan idipok, kin ijejol pokon. Irail kin wia me, pwen ale mar kamon

a kitail, pwen ale me jo kamon. <sup>26</sup> Nai ari aktan jopuiok; nai kin pepe, a kaidin dueta me woki nan wäwä; <sup>27</sup> Pwe i kin jok pon war ai, pwen katenedi, pwe i de padaki on akai, ap pein lokidokila.

## 10

<sup>1</sup> PWE ri ai kan, i men, komail en aja duen jam atail akan, me mi pan palin dapok eu o kotela madau o. <sup>2</sup> Irail karoj ap paptaij on Mojej ni palin dapok o ni madau o. <sup>3</sup> O karoj tunoler jak nenin, <sup>4</sup> O karoj nim jan pil nenin; pwe irail nim jan paip nenin, me kotikot re 'rail, iei paip o Krijtuj. <sup>5</sup> A me toto re 'rail, me Kot jota kak kupuramauki, pwe irail lokidokilar nan jap tan. <sup>6</sup> A mepukat wiaui, pwe kitail de kaalemoni, pwe kitail ender inon ion me jued akan duen irail inon ion. <sup>7</sup> Komail pil ender kati ani mal due irail, duen a intinidier: Aramaj pukat mondi penan nam o nim ap uda madomadon. <sup>8</sup> Kitail pil der wia nenek, duen me akai irail wiadar, ap rianen jilekid mekilar ni ran ta ieu. <sup>9</sup> Kitail pil der kajonejon Krijtuj, duen akai irail kajonejon i, ap mekilar jerpent kai. <sup>10</sup> Komail pil der lipaned, duen akai ir lipanededar, ap kame kilar men kamekam men. <sup>11</sup> Mepukat karoj wiaui on irail men kaalemoni; ap intinidier, pwe men panau kin kitail, pwe kitail leler imwin kaua. <sup>12</sup> Ari ma amen lamelame, me a kajinenda, en kalaka pein i, pwe a de pupedi. <sup>13</sup> Jota jonejon eu lel on komail, i eta, me aramaj itar on, pwe Kot me melel, me jota kin mueid on komail jonejon eu, me komail jota itar on. A ni jonejon a pan kotin kaimwijokela, duen me pan kak pa omail <sup>14</sup> Ari kompoke pai kan, komail tane jan kati ani



mal! <sup>15</sup> Mepukat i indai *on* komail, pwe komail me lolekon; a pein komail kajauiaada, me i inda. <sup>16</sup> Dal en pai me kit kin kapaiada, kaidin i dal en atail jaupena ren ntan Krijtuj? O prot me kit kin pilitiki pajan, kaidin i atail jaupena en war en Krijtuj? <sup>17</sup> Pwe kitail me toto me lopon ta ieu, o war ta ieu, pwe kitail karoj tunole *jan* lopon ta ieu. <sup>18</sup> Komail kilan Ijrael pali uduk. Irail me kin *kan jan* mairon, kaidin irail pil minimini *on* pei jarau? <sup>19</sup> A da me i en inda? I en inda me mairon *on* ani mal meakot? De dikedik en ani mal meakot? <sup>20</sup> A karoj me men liki *kan maironki*, re kin *maironki on* tewil akan a kaidin *on* Kot. A i jota mauki, komail en minimin *on* tewil akan. <sup>21</sup> Komail jota kak nima *jan* dal en Kaun o pil *jan* dal en tewil akan; komail jota kak *ian* tepel en Kaun o pil tepel en tewil akan. <sup>22</sup> De kitail en palian Kaun o? Kitail me kelail *jan* i? <sup>23</sup> A muei *oner* meakaroj, a kaidin karoj me kin kamaula; a muei *oner* meakaroj, a kaidin karoj me kin kapunla. <sup>24</sup> Jota amen me pan apwali pein a dipijou, a en amen. <sup>25</sup> Karoj me kin netila nan wajan netikila uduk, komail *kan*, ap der kalelapok duen *jon* ar, pwe komail der katoutouki injen omail. <sup>26</sup> Pwe japwilim en Kaun jappa o audepa *kan*. <sup>27</sup> A ma amen, me jopojon pan luke komail, en toun kapara kamadip, o ma komail men *ian*, ari, karoj me pan nek *on* komail, komail en *kan*, ap der kalelapok duen *jon* a, pwe komail der katoutouki injen omail. <sup>28</sup> A ma amen pan indan komail: Met kijan mairon en ani mal, komail der *kan* pweki i, me kajaledar, pwe komail der kawela injen arail. <sup>29</sup> A met i jolar inda duen pein injen om a duen injen en amen. Pwe menda injen en

amen pan kajauiaada ai jaladokelar? <sup>30</sup> Pwe ma i ian kan ki danke, menda i en kalok jued, pwe i tunole ni ai danke? <sup>31</sup> Ari, ma komail kan de nim de wia meakot, komail en wia meakaroj, pwen wauneki Kot. <sup>32</sup> Komail der kadipikelekel men Juj, de men Krik, de momodijou en Kot, <sup>33</sup> Duen i kin pok *on* amen amen ni ai wiawia kan karoj, o jo moneki me pein ai, pwen jauaja me toto, pwe irail en dorela.

## 11

<sup>1</sup> KOMAIL idauen ia do duen i kin idauen Krijtuj. <sup>2</sup> I kin kapinaki komail omail tamataman ia ni meakan karoj, o dadaurata pun kan, duen i kakalikidi *on* komail er. <sup>3</sup> A i men, komail en ajadar, me Krijtuj tapwin ol akan, a ol me tapwin li, a Kot me tapwin Krijtuj. <sup>4</sup> A ma amen amen ren ol akan wia kapakap de kokop ap lijoropedi, a kin kajuedeki pein *mon* a. <sup>5</sup> A ma li amen wia kapakap de kokop, ap jota lijoropedi, nan i kin kajuedeki pein *mon* a, pwe a rajon me pit en *mon* a jei jei jan. <sup>6</sup> Pwe ma li amen jota lijoropedi, en koteda, a ma a kanamenok li en kotedar o kotokot, i en pwaindi *mon* a. <sup>7</sup> A ol o ender lijoropedi, pwe i me kajanjal o linan en Kot, a li o me linan en ol o. <sup>8</sup> Pwe ol jo tapi jan li, a li jan ol o. <sup>9</sup> Pwe ol jota wiaui *on* li, a li wiaui *on* ol o. <sup>10</sup> I me li o en kida manaman eu pon *mon* a pweki tounlan kan, <sup>11</sup> Ari jo, li amen jota kak mia ma jota ol; o ol amen jota kak mia, ma jota li, a mepukat ren Kaun o. <sup>12</sup> Pwe duen li o a tapi jan ol, iduen ol o wiaui kida li, a karoj wiaui er ren Kot. <sup>13</sup> Komail en pein kajauiaada, ma a janjal mau, ma li amen kapakap

on Kot, ap jo lijoropedi. <sup>14</sup> De pein komail aja, me kanamenok pan ol, ma a pwilipepei. <sup>15</sup> A linan en li a pwilipepei, pwe pid en mon a en ko on i, en pwaindi i. <sup>16</sup> A ma amen re omail men akamai, a en aja, me kit jota kin wia due, momodijou en Kot akan pil jo. <sup>17</sup> A ni ai kujonededa mepukat i jota kin kapina omail pokon pena, me jota kin kamaui a kajuedeki komail, <sup>18</sup> Pwe ni omail pokon pena nan momodijou, i ronadar, me komail kin liak toror pajan, o i mur kamelele. <sup>19</sup> Pwe komail en liak toror pajan, pwe me pun kan en janjal kida re omail. <sup>20</sup> Komail lao pokon pena waja kij, kaidin i jak kamadip en Kaun o. <sup>21</sup> Pwe ni kamadip toun kapar kin amatan maj, a amen men manadar, a amen jokolar. <sup>22</sup> Jota im omail, waja en mana o nim? De komail kin mamaleki momodijou en Kot o kanamenok ir ala, me jota ar tunol? Da me i en inda? I en kapin komail? Ni mepukat i jota pan kapina. <sup>23</sup> Pwe i aleer jan ren Kaun o, me i pwiliki on komail er, me Kaun Iejuj pon ota en a panala, a limada prot, <sup>24</sup> Murin a laolaoki, kamauieda, pilitiki pajan, majani: Ale tunole war ai met et, me pilitiki on komail, en wia, pwen katakataman kin ia. <sup>25</sup> A murin jak, a pil kotin limada dal majani: Dal wet iei inau kap, me wiaui kidar nt' ai. Pan pak en omail nima jan, komail wiaki men kataman kin ia. <sup>26</sup> Pwe pan pak en omail kan prot wet o nima jan dal wet, komail kajanaleda en Kaun a matala, lao a kotido. <sup>27</sup> Ari me kan prot wet o nim jan dal en Kaun o ap jo war on iei me dip ion war o ntan Kaun o. <sup>28</sup> Amen amen en kajaiada pein i, ap kan jan prot o nima jan dal o. <sup>29</sup> Pwe me

kan o nim jowar, kin kan o nim kadeik on pein i, pwe a jota kajampwaleki war o. <sup>30</sup> Nan i me toto nan pun omail me luetalar o jomaudar, o me toto mairedier. <sup>31</sup> Pwe ma kitail kajaiada pein kitail, kitail jota pan pakadeikada. <sup>32</sup> A ma kitail pan pakadeikada, kitail pan kalokolok ren Kaun o, pwe kitail de ian men liki lokidokila. <sup>33</sup> Ari ri ai ol akan, komail lao pokon pena pwen jak, en papajan pena amen amen. <sup>34</sup> A ma amen men manadar, i en mana maj nan im a; pwe komail de pokon penan kadeik o. A me lua kan i pan kapunala ni ai pwara won.

## 12

<sup>1</sup> RI ai kan, i jota men, komail en jaja duen pwaij nenin akan. <sup>2</sup> Komail ajaer, me komail tikidar men liki, ap kakalua ren dikedik en ani loten akan, duen komail kakaluaer. <sup>3</sup> I me i men kaaja kin komail, jota amen, me lokaiaki Nen en Kot, kak kariaala Iejuj. O jota amen me pan kak inda: Main Iejuj, ma jo ren a Nen jarai. <sup>4</sup> A pai en mak akan me wuki pajan, a Nen me ta men. <sup>5</sup> O jon en dodok me toto, a kaun me ta men. <sup>6</sup> O akai jon en manaman mia, a Kot me ta men, me kotin wiawia meakaroj ren amen amen. <sup>7</sup> A pwaij en Nen jarai me pan on amen amen, pwen men kamaiiada. <sup>8</sup> Pwe amen ereki majan en erpit ren Nen, a amen majan en kaparok ren Nen ota. <sup>9</sup> O on amen, en pojon, a ren Nen ota, o on amen pai kan, men kakelada me jomau kan, a ren Nen ota. <sup>10</sup> O on amen, en wiada manaman, o on amen, en deideikop, o on amen, en kajai nen akan, o on amen, en lokaia nil wuki pajan, o on amen, en

kawukila *nil* akan. <sup>11</sup> A mepukat karoj wiawian Nen ota, nene *on* amen amen duen kupur a. <sup>12</sup> Pwe duen war eu ta ap kokon toto mia, a kokon en war karoj wiala war ta ta ieu, iduen Krijtuj. <sup>13</sup> Pwe Nen ta ieu, me kitail paptaijeki *on* war ta ieu, ma kitail men Juj de men Krik, ma ladu de me maioda, kitail karoj me paptaijeki Nen ta ieu. <sup>14</sup> Pwe war kaidin kokon ta ieu, pwe kokon toto. <sup>15</sup> A ma pat en nä pan inda: *Nai* kaidin kumut eu, o i me *nai* jota kijan war; a iaduen, i me a jota pan kak kijan war o? <sup>16</sup> A ma jalon o pan inda: Kaidin *nai* kijan war o, pwe kaidin por en maj eu *nai*; a iaduen, i me a jota kijan war o? <sup>17</sup> Ma war pokon por en maj eu, da me pan jalon o? A ma war pokon pan jalon o, da me pan tuma? <sup>18</sup> Ari, Kot me kotin kokon penan war ta ieu kajon akan, duen a kotin kupureda. <sup>19</sup> A ma kokon karoj wiala kokon ta ieu, ia pan war o? <sup>20</sup> Ari, kokon akan me toto, a war o me ta ieu. <sup>21</sup> Por en maj eu jota kak indan kumut: Kaidin meakot re i koe; de pil tapwi jota kak indai *on* pat en nä kan: Kaidin meakot re i koma. <sup>22</sup> Pwe kokon en war kai likamata re me luet, a jo, pwe re me kajampwal. <sup>23</sup> O kokon en war kai, me kitail kin lamelame, me re jota non mau, kitail kin apapwali *jan* me tei kan, o irail me jota non janjal mau, kitail kin kapwataki. <sup>24</sup> Pwe irail me janjal mau, jota kin mau *on* en kapwataki. A Kot kotin kapad pena war o kapwataki me luet oko *jan* me tei kan, <sup>25</sup> Pwe war de japarok *pajan*, a kokon akan en apapwali pena. <sup>26</sup> O ma *kajan* ta ieu matakada, *kajan* karoj ap *ian* matakada; o ma *kajan* ta ieu pan *kalinanada*, kokon karoj pan *ian*

polauleki. <sup>27</sup> A komail war en Krijtuj o kokon akan amen amen duen pwaij a. <sup>28</sup> A iet akan, me Kot kotiki *on* momodijou: Kaieu wanporon akan, ap jaukop akan, a kajilu jaunpadak kan, ap me wiada manaman akan, ap pai kan men kakelada me jomau kan, ap men jauaja, o jaumaj akan, o jon en lokaia. <sup>29</sup> Iaduen irail karoj me wanporon akan? Karoj me jaukop akan? Karoj me jaunpadak kan? Karoj me men wia manaman akan? <sup>30</sup> Karoj ar pai en mak kan, men kakelada me jomau kan mi ren karoj? Karoj kin lokaia *nil* pajan? Karoj kin kajiriwuk lokaia? <sup>31</sup> A komail *inon ion* pai en mak lapalap akan, i ap pan kajale *on* komail al apot, me mau *jan* mepukat karoj.

## 13

<sup>1</sup> MA i aja lokaia en aramaj akan o tounlan kan, ap jota limpok, nan i rajon *nil* en mata mal de *nil* en jimpel. <sup>2</sup> O ma i aja deideikop o ereki me rir akan karoj, o tiak kan karoj, o *nai* dir en pojon, me itar *on* en kamokid wei nana kan, ap jota limpok nan jota meakot *nai*. <sup>3</sup> O ma i pan kijakija wei ai dipijou karoj, pwen katunoleki me jamama kan, o ma i kida war ai, pwen karonala, ap jota limpok, nan jota katepa *on* ia. <sup>4</sup> Limpok kin kanonama o kadek, limpok jota kin peirin limpok jota kin akmomo o jo kejej. <sup>5</sup> A jota kin aklemai, a jota kin roporop *on* pein i, a jo jerkailon, a jota kin depuk *on* en amen a jued. <sup>6</sup> A jota kin peren me japun, a a kin perenki me melel. <sup>7</sup> A kin kak pa meakaroj, o kin pojon karoj, a kaporoporeki karoj, o lolin *on* meakaroj. <sup>8</sup> Limpok jota pan tukedi, a deideikop akan pan tukedi, o lokaia kan pan jola, o lolekon pan kunla.

<sup>9</sup> Pwe kitail me er pali ta, o kokop pali ta. <sup>10</sup> A lao kaunjokala, me pali ta pan momela. <sup>11</sup> Ni ai jeri i kin lokaia dueta jeri amen o i lamelame dueta jeri amen, o kajau dueta jeri amen, a i lao wiala ol amen, i muei *jan* tau en jeri. <sup>12</sup> Pwe anjau wet kitail kin ireron nan klaj edied eu, a mur a pan janjal mau. Anjau wet i ekij lolekonlar, a mur i pan aja duen a aja ia. <sup>13</sup> Ari *jon* jilu pukat: Pojon, kaporopor o limpok pan mimieta, a me lapalap re 'rail limpok.

## 14

<sup>1</sup> KOMAIL anane limpok, pil inon ion pai *nenin* akan, a iet me kajampwal re 'rail, kokopada! <sup>2</sup> Pwe me kin lokaia kida *nil* en wai, kaidin aramaj akan, me a kin lokaia *on*, a *on* Kot, pwe jota amen kin dedeki; ari jo, ni *nen* o a kin lokaia kida me rir akan. <sup>3</sup> A me kin kokop, kin padaki *on* aramaj akan, pwen kamaui, o panau o kamait ir ala. <sup>4</sup> A me lokaiaki *nil* en wai, kin kamaui pein i, a me kin kokop, kin kamaui momodijou. <sup>5</sup> I men, komail karoj en aja lokaia ki *nil* toror, a mak eta, komail en kokopada, pwe me kin kokopada, me lapa *jan* me kin kaparok ki *nil* toror, ma a jo kak kajiriwukila, pwe momodijou en kamau kila. <sup>6</sup> Ari ri ai kan, ma i pwara won komail, ap lokaia ki *nil* toror, da katepa *on* komail, ma i jota kaweweda de kajanjaleda, de kokopada, de padak? <sup>7</sup> Iduen meakan, me kin lokolokaia ap jota memaur, ma men kwai de arp jota pan *nor* pajan, ij me pan kak dedeki, da me ira kauleki? <sup>8</sup> O ma koronete pan popeuk *pin*, ij me pan onopadan mauin? <sup>9</sup> A iduen komail, ma komail pan lokaia ki *nil* toror, ap jota

kaweweda, ij me pan dedeki? Pwe omail lokaia pan me mal kot. <sup>10</sup> Jon en lokaia toto nan jappa, a jota eu me jo puloi. <sup>11</sup> A ma i jaja wewe en lokaia eu, i pan rajon men wai men *on* me kin kaparok, o me kin kaparok, pan rajon men wai men *on* ia. <sup>12</sup> A pil dueta komail, pwe komail kin anane pai *nenin* akan, komail ari pil *nonki* kakairida ni mepukat, pwen kamauie kila momodijou. <sup>13</sup> A ma amen lokaia kida *nil* en wai, i en kapakap ap pil kajiriwukila. <sup>14</sup> Pwe ma i wia kapakap ki lokaia *nil* en wai eu, *nen* i kin kapakap ap jota katepa *on* amen. <sup>15</sup> Ari, da me i pan wia? I pan kapakap ni *nen* i ap pil pan kapakap ni ai lamelam; i pan kapina ni *nen* i ap pil kapina ni ai lamelam. <sup>16</sup> A ma koe pan kapaiada ki *nen* o, iaduen me jota dedeki pan kak inda amen murin om kapina? Pwe a jaja me koe indinda. <sup>17</sup> Ei me mau melel om kapikapina, a jota kadepa *on* me teio. <sup>18</sup> I kin danke Kot, pweki i kin lokaiaki *nil* toror jan komail. <sup>19</sup> Ari jo nan momodijou i men kida lep in lokaia limau, me pwili jan ai lamelam jan lep in lokaia *nen* ni *nil* toror, pwen padaki *on* me tei kan. <sup>20</sup> Ri ai kan, komail der wiala jeri ni omail lamelam, a ni me jued komail en rajon kijin jeri, a ni omail lamelam komail en unjokela. <sup>21</sup> A intinidier nan kapun: Lokaia o kil en aua toror, me I pan lokaiaki *on* kainok wet, a re pil jota pan duki *on* ia, me Kaun o kotin majani. <sup>22</sup> Nan i me lokaia toror mia, pwen kileledi kaidin me pojon akan, a me jopojon akan; a deideikop kaidin *on* me jopojon akan, pwe *on* me pojon akan. <sup>23</sup> A ma momodijou pan pokon pena waja kij, o ma



karoj pan lokaia ni nil toror, a ma akai ian me jota dedeki, de akai me jopojon, irail jota pan inda, me komail iakalar? <sup>24</sup> A ma karoj kin kokop, o amen pan pwarado, me jopojon, o me jota dedeki, karoj pan kajanjale *on* i dip a, o a pan pakajau ren karoj. <sup>25</sup> Iduen a me rir akan nan *monion* i pan janjaleda, o a pan tairokedi ni maj a, kaudoki *on* Kot, o pan inda, melel Kot kotikot re omail. <sup>26</sup> Ri ai kan, iaduen komail ni omail pokon pena, kaidin amen amen kin kida pjalm eu? A amen kin kawewe, a amen nil toror, a amen kajanjal eu, a amen kin kajiriwukila; a karoj en wiaui, en kamauiada. <sup>27</sup> A ma amen pan wia nil en wai, me ta riamen, de ma me toto, re pan jilimen, a irail pan irok wei a amen en kajirawukila. <sup>28</sup> A ma jota men kajiriwuk mia, i en nenenla nan momodijou; a en kajoi *on* pein i o Kot. <sup>29</sup> A riamen de jilimen ren jaukop akan pan kak kaparok, a me tei kan en kajuiada. <sup>30</sup> A ma amen, ren me momod waja o, pan diar kajanjal eu, men maj ap pan nenenla. <sup>31</sup> A komail karoj kak kokop, irok weida, pwe karoj en padakki o kamaitala. <sup>32</sup> A *nen* en jaukop akan kin duki *on* jaukop akan. <sup>33</sup> Pwe kaidin komoan me *pin* men Kot, a en popol duen ni momodijou en jaraui akan karoj. <sup>34</sup> Omail li akan en nenenla nan momodijou kan, pwe a jota muei *on* irail, en kaparok; a irail en papa, duen kapun me pil majani. <sup>35</sup> A ma irail men aja okotme, irail en kalelapok ren arail warok kan ni deu 'rail, pwe me kanamenok, li en kaparok nan momodijou. <sup>36</sup> De majan en Kot tapi jan komail? De a ko won komail eta? <sup>37</sup> A ma amen lamelame, me a jaukop amen,

de me a *nenin*, a en aja wewe en me i intinki won komail, pwe mepukat kujoned en Kaun o. <sup>38</sup> A ma amen lolepon, i en lolepon. <sup>39</sup> Ari ri ai kan en inon ion kokop, o ender kainapwi lokaia nil toror. <sup>40</sup> A meakaroj en wiaui nin tiak mau o pun.

## 15

<sup>1</sup> RI ai kan i men kataman kin komail ronamau, me i padaki *on* komail er, me komail pil aleer o pil tinain kidar. <sup>2</sup> O me komail pil dore kila, ma komail pan dadaurata majan o, me i padaki *on* komail er, ma komail jo pojon mal. <sup>3</sup> Pwe i ujaki *on* komail er, me i pil aleer duen Krijtuj, me kamata kilar dip atail akan duen kijin likau kan. <sup>4</sup> O me a Jaredier o kaiajadar ni kajilu en ran duen kijin likau kan, <sup>5</sup> O me a pwara won Kepaj, ap *on* irail me ekriamen ko, <sup>6</sup> Ap kotin pwara won jaulan limepuki jama ni anjau takij; kij arail me toto mimieta lel met, a akai mairedier. <sup>7</sup> Murin met a kotin pwara won Iakopuj, ap *on* wanporon akan karoj. <sup>8</sup> A ikmuri a kotin pwara *don* ia mon ai ip japal, <sup>9</sup> Pwe pokindidi ren wanporon akan nai, me jota war *on* kaindinda wanporon amen, pweki ai pei *on* momodijou en Kot. <sup>10</sup> A mak en Kot, me i wanporon kilar. A kaidin mak mal eu *on* ia, pwe i dodok laud *jan* irail karoj, ari kaidik nai, pwe mak en Kot, me mi re i. <sup>11</sup> Ari, ma nai de irail, pwe iduen at padaki wei, o iduen komail pojonlar. <sup>12</sup> A ma i aude pan at padak, me Krijtuj iajadar *jan* ren me melar akan, a da me akai re omail kin inda, dene me melar akan jolar pan mauredar? <sup>13</sup> A ma me melar akan jota pan maureda, nan Krijtuj pil jota iajadar. <sup>14</sup> O

ma Krijtuj jota iajadar, at padak me mal, o omail pojon pil me mal. <sup>15</sup> O kitail pil pan diarokada, me je jaunkadede likam ren Kot, aki at kadededar, me Kot kotin kaiajadar Krijtuj, me a jo kaiajadar, ma me melar akan jota pan kamaureda. <sup>16</sup> Pwe ma me melar akan jota pan kamaureda, nan Krijtuj pil jo kaiajadar. <sup>17</sup> A ma Krijtuj jo kaiajadar, omail pojon me mal, o komail mimieta ni dip omail. <sup>18</sup> Iduen pil irail, me melar ren Krijtuj akan, lokidokila. <sup>19</sup> A ma kitail kaporoporeki Krijtuj nan maur et eta, nan kitail me jued *jan* aramaj akan karoj. <sup>20</sup> A melel, Krijtuj kaiajadar *jan* ren me melar akan, ap wiala mejeni nan *pun* en ir me mamair akan. <sup>21</sup> Pwe mela tapi *jan* aramaj ta men, iduen maureda *jan* ren me melar akan tapi *jan* aramaj ta men; <sup>22</sup> Pwe duen karoj me mela ki Adam, nan iduen karoj pan kamaurela ren Krijtuj, <sup>23</sup> A amen amen ni kakairokdo: Krijtuj maj ap me japwilim en Krijtuj, ni a pan kotin pwarado; <sup>24</sup> A murin mepukat pan imwi, a lao kotiki *on* Kot o Jam a wei, a lao kaloedier kaun akan karoj, o me poe kan, o manaman akan. <sup>25</sup> Pwe a pan kotin kaunda, lao a imwintiti karoj lodi *on* pan aluwilu a kan. <sup>26</sup> A ikmurin imwintiti iei mela. <sup>27</sup> Pwe a kotin mueid *on* meakaroj pan aluwilu a. Ari ni a kotin majanier me karoj lodier a janjaledar, me i jota *ian* me kotin kaloedi *on* i meakaroj. <sup>28</sup> A meakaroj lao lodi *on* i, Na ap pil pan upan i, me kotin kaloedi *on* i meakaroj, pwe Kot en kotin poedi meakan karujia. <sup>29</sup> A ma me melar akan jolar pan kamaureda, da me irail en wia, me kin paptaijeki *on* me melar akan? Menda re paptaijeki *on* irail? <sup>30</sup> O menda

kit kin kalokolok anjau karoj? <sup>31</sup> Pwe ran karoj i kin mela, pweki kapin pa i, me i aleer ren Krijtuj Iejui atail Kaun. <sup>32</sup> A ma i pei *on* man laualo nan Epijuj, duen aramaj akan kin wiada, da kadepa *on* ia, ma me melar akan jota pan kamaureda? Kitail en mana o nim, pwe lakap kitail pan mela. <sup>33</sup> Der duki *on*, me kajonejon komail! Kajoi jued kin kawela tiak mau. <sup>34</sup> Komail ari punala, o pirida o der wiada dip! Pwe akai jaja duen Kot. Mepukat i indai *on* komail, pwen kanamenokki komail. <sup>35</sup> A ele amen pan inda: Iaduen me melar akan ar pan kamaureda? O iaduen war ar, me re pan maur kida? <sup>36</sup> Pweipwei men koe! Pwe me koe kin kamoredi, jota pan maureda, ma a jota pan mela. <sup>37</sup> O me koe kamoredi, kaidin war ota me pan para, pwe wan korn eu ta, ele wan wit de eu wa toror. <sup>38</sup> A Kot pan kotiki *on* war a, duen a kotin kupura, o eu eu en war akan pan ale udan mom a. <sup>39</sup> Uduk karoj kaidin *jon* ta ieu, pwe eu *jon* uduk en aramaj akan, a eu *jon* uduk en man akan, a eu *jon* en manpir akan, a eu *jon* en mam akan. <sup>40</sup> A war *lan* o war pwel akan mia, a *linan* en war *lan* eu *jon* o *linan* en war pwel eu *jon*. <sup>41</sup> A eu *jon* *linan* en katipin, o eu *linan* en maram, o eu *linan* en uju kan, pwe nan uju kan me wuki *pajan* ki ar *linan* eu eu. <sup>42</sup> Nan iduen en me melar akan ar pan maureda. A kin kamoremoredi ap mor *pajan*, o pan kamaureda jo mor *pajan*. <sup>43</sup> A kin kamoremoredi ni jo *linan*, o pan maureda ni *linan*; a kin kamoremoredi ni luet, o pan maureda ni manaman; <sup>44</sup> A pan kamoremoredi war pwel o pan kamaureda war *nenin*; pwe ma

war pwel mia, nan a pil pan war *nenin*. <sup>45</sup> Duen a intinidier: Tapin aramaj Adam wiauiet, pwen *nen* maur amen, a Adam tia mur, pwen *nen* en kamaur. <sup>46</sup> A war *nenin* kaidin i men maj pwe war pwel, a muri me *nenin*. <sup>47</sup> Tapin aramaj wiaui kida pwel, a aramaj kariamen kotido *jan nanlan*. <sup>48</sup> A duen tapin aramaj wiaui pwe, iduen karoj me wiaui pwe o duen men *nanlan* o, iduen men *nanlan* kan. <sup>49</sup> O duen kitail wa mom en pwel, iduen kitail pil pan wa mom en *lan*. <sup>50</sup> Ri ai kan, iet me i men *inda*: Uduk o nta jota kak jojoki wein Kot; o me mor *pajan* kan jota pan jojoki me jo mor *pajan*. <sup>51</sup> *Kilan*, *nai* me kadiarok *on* komail kaponepon eu: Kaidin kitail karoj pan mela, a kitail karoj pan nitwilida. <sup>52</sup> *Madan* ni marep ta ieu, koronete en muri lao popeuk. Pwe koronete pan popeuk, a me melar akan ap pan kamauredan jomor *pajan* a kitail pan kawilikapada. <sup>53</sup> Pwe mor *pajan* wet pan kiawikilan jo mor *pajan*; o mela wet kiawikilan jomela. <sup>54</sup> A mor *pajan* wet lao kiawikilan jo mor *pajan* o mela wet kiawikilan jomela, majan o ap pan pwaida, me intinidier: Maur kadalala mela. <sup>55</sup> Mela koe, ia om tata? Mela ia om poedi? <sup>56</sup> Mana en mela dip, a manaman en dip kapun. <sup>57</sup> Danke *on* Kot, pwe a kotiki *on* kitail, en poediki atail Kaun Iejuj Krijtuj. <sup>58</sup> Ari ri ai kompok kan, komail kelail kaukaule o der wukiwukjili, a kakairida ni omail wiawia en Kaun o, pwe komail aja, me omail dodok *on* Kaun o kaidin dodok mal.

## 16

<sup>1</sup> A DUEN kijakij *on* jarai kan, me komail pan

ki pena, i men, komail en wiada, duen i kakaliki *on* momodijou en Kalejia kan. <sup>2</sup> Ni at en ran en wik kan amen amen re omail en nikidala ekij, o ki pena duen wan a kak *on* pwe onop de wiaui, i lao pwara *won*. <sup>3</sup> I lao pwara weilar, meakai, me komail pan kileledi, irail me i pan ilakewei, en walan Ierujalem omail kijakij *ianaki* kijin likau. <sup>4</sup> O ma a kon *on*, i en pil jailok wei; irail ap pan *ian* ia jailokala. <sup>5</sup> A i pan pwara *won* komail ni ai dauli Majetonien, pwe i pan weid nan Majetonien. <sup>6</sup> Ele i pan mimieta re omail, anjaun kapau lao nikier, pwe komail en kalua ia la waja, me i pan jailokala ia. <sup>7</sup> Pwe anjau wet i jota pan jup re omail, pwe i kaporoporeki, me i pan mimieta re omail anjau kij, ma Kaun pan kotin mueid *on* ia. <sup>8</sup> A i pan mimieta Epijuij lao pentikoj. <sup>9</sup> Pwe wanim tälap ritida mo i, me kareda wa toto; a imwintiti me toto. <sup>10</sup> A Timoteuj lao pwara *won* komail, apwali i, pwen jondi mau re omail, pwe a kin *ian* ia wiawia dodok en Kaun o. <sup>11</sup> Jota amen en mamaleki i, a kalua i *don* ia popol, pwe *nai* o ri atail akan kin auiaui i. <sup>12</sup> A duen ri atail Apoloj, *nai* me poeki re a pan pak toto, en *ian* ri atail akan pwara *won* komail, a a kan pwara wei anjau wet; a a pan pwara wei lao anjau mau. <sup>13</sup> Komail majamajan o dadaurata ni pojon, komail wia duen ol melel, o komail en kelail. <sup>14</sup> Meakaroj en wiaui ni limpok <sup>15</sup> I ari panau komail, ri ai kan, pwe komail aja penainai en Jtepanaj, me ir tapida jaulan en Akaia, o me pein irail *inon ion* dodok *on* jarau kan, <sup>16</sup> Pwe komail en peiki *on* irail, o *on* irail karoj me *ian* ni ar wiawia o dodok. <sup>17</sup> I peren kida en

Jtepanaj, o Portunatuj, o Akaiuj ar pwarador, pwe meki, me komail jo ki *on* ia mepukat ki *don* ia. <sup>18</sup> Irail kaperenda *nen* i o pil *nen* omail; komail ari wauneki me due met. <sup>19</sup> En momotijou en Ajien akan ar ranamau *won* komail. A Akwila o Prijila kin ranamau *won* komail pan Kaun o momodijou nan im ara. <sup>20</sup> Ri atail ol akan karoj kin ranamau *won* komail. Komail ranamauki pena metik jarai. <sup>21</sup> Nai Pauluj me intin kilan komail ai ranamau ki *pein* pa i. <sup>22</sup> Ma amen jota kin pok *on* Kaun Iejuj Krijtuj, a pan anatema! Maranata! Iet wewe; A pan riala! Atail Kaun kotido. <sup>23</sup> Mak en Kaun Iejuj Krijtuj en mimieta re omail! <sup>24</sup> Ai limpok *on* komail pan Krijtuj Iejuj pan mimieta re omail! Amen.

**Kadede Kap Pjam Akan**  
**The New Testament and Psalms in the Pohnpeian**  
**language of the Federated States of Micronesia (old**  
**translation, using old alphabet)**

Public Domain

Language: Pohnpeian

2014-11-10

---

PDF generated using Haiola and XeLaTeX on 11 Nov 2022 from source files  
dated 30 Nov 2021

1941731f-581e-5815-a2a4-a976cf53af02